

戰

國

策

補

釋

序

漢書藝文志戰國策三十三篇班氏著其旨要日記春秋  
後今隨書經籍志劉向錄三十二卷高誘注二十一卷唐  
志則高誘注亦增爲三十二卷更五季之亂至宋而崇文  
總目僅存十一篇曾子固校編史館書籍訪求佚闕書乃  
復完自宋迄今行於世者惟鮑彪姚宏兩家注本清嘉慶  
中吳縣黃丕烈得姚本重刻之且爲之札記近所稱爲善  
本者也然其錯繆違失尙不可勝數學者病焉自有清中  
葉校讐之學最盛而高郵王石臞父子魁然獨開其宗其  
後如俞曲園孫仲容之倫皆精思窅冥以追前軌可謂斐

然庶幾者矣故周秦以來之書無不可讀而奧辭賡義紬  
繹既久轉或有諸先輩所未及盡者則後學亦得從事爲  
補苴此吾友仲翬戰國策補釋所由作也仲翬少年發名  
南學筮仕來蜀晚遭國變閉門不出日事著書所欲成者  
多而補釋適先寫定以予輒有知聞屬爲弁序竊謂戰國  
策之爲書南豐論之詳矣蘇秦商鞅吳起李斯以亡其身  
諸侯及秦以亡其國所不可廢者上繼春秋下至楚漢二  
百四十年間行事而已而獨以劉子政爲惑於流俗不篤  
自信則有過詞焉子政之言曰亦可喜皆可觀正喜其事  
之可觀耳非喜其縱橫謀詐也不然何以必推極於仁義

教化而斤斤乎文武孔子哉降及今日世亂極而舊俗亡  
文武孔子其道墜地比諸戰國殆尤弗如無父子之親泯  
君臣之分去夫婦之別三綱盡廢而猶然可以篡盜吞滅  
責之者未之有也子政南豐生右文之代欲推其治於隆  
平而又皆校讐中秘自擅絕學故所發如彼若仲翬者身  
丁叔末牢落非偶以今之數退證古之危亡其感觸當何  
如也顧尙有少幸者宇內廢除文字之聲雖蜩螗盈耳而  
舊籍刊播好事者彌多聲訓之學愈益昌大此以見天地  
正氣之中勢有不能摧盪陷滅之理則仲翬是書方將與  
高郵諸儒揚其後勁而爲晚起學者闢此榛塗未嘗不足

以私慰也至其臨文下義審諦周挾不景響依違亦不支  
離附會則眞能洞達神愜善立條科者已讀者當自得其  
用心所至豈尙俟予言哉甲子重九日華陽林思進

戰國策補釋目錄

卷一

綴言

吳師道編國策章目

劉向敘

東周策

西周策

秦策一

卷二

秦策二至五

齊策一至二

卷三

齊策三至六

楚策一至四

卷四

趙策一至四

卷五

魏策一至四

韓策一至二

卷六

韓策三

燕策一至三

宋策

衛策

中山策



戰國策補釋綴言

一是編就黃氏重刻刻川姚氏本及元刻吳氏校注本於原文之脫誤舊注之差失管蠡所及並爲辨證其無從索解者仍以闕疑

一是編標舉章名悉從吳師道所編目錄卽義有未安亦仍其舊

一凡所釋字義必徵引古說以爲依據如鮑注之齊伐趙之釋爲趨而此者三而釋爲若並爲援證以申其義其常訓易通卽高鮑無注亦不增補

一高郵王念孫讀書雜誌吳縣黃丕烈國策札記於策

文多所校正是編於兩家之說考訂精審者卽不復爲異同或以所說尙有疑義則臚舉其文而加以商榷

一國策地理鮑吳並多違失陽湖張琦所著戰國策釋地已多糾正其有未及亦就可攷者著之於編

一是編惟於字句脫誤求其可通若事理之得失不復參以論斷自維譾陋舛繆必多尙冀博雅君子進而教之

仲翬自識

元吳師道編戰國策目錄

東周 凡二十二章

秦興師臨周章

秦攻宜陽章

東周與西周戰章

東周欲爲稻章

昭獻在陽翟章

秦假道於周章

楚攻雍氏章

周最謂石禮章

周相呂倉章

溫人之周章

或爲周最章

石行秦章

蘇厲爲周最章

謂周最曰章

爲周最謂魏王章

趙取周之祭地章

杜赫欲重景翠章

周共太子死章

三國隘秦章

昌他亡西周章

昭翦與東周惡章

嚴氏爲賊章

西周

凡十七章

薛公以齊章

秦攻魏將犀武章

秦令樗里疾章

雍氏之役章

周君之秦章

蘇厲謂周君章

楚兵在山南章

楚請道於二周章

司寇布章

秦召周君章

犀武敗於伊闕章

韓魏易地章

秦欲攻周章

宮他謂周君章

謂齊王曰章

三國攻秦反章

犀武敗周章

秦一 凡十三章

魏鞅亡魏入秦章

蘇秦始將連橫章

秦惠王謂寒泉子章

冷向謂秦王章

張儀說秦王章

張儀欲假秦兵章

司馬錯與張儀章

張儀之殘樗里章

張儀欲以漢中章

楚攻魏張儀謂秦章

田莘之爲陳軫章

張儀又惡陳軫章

陳軫去楚之秦章

秦二 凡十六章

齊助楚攻秦章

楚絕齊章

秦惠王死章

義渠君之魏章

醫扁鵲章

秦武王謂甘茂章

宜陽之役馮章謂章

甘茂攻宜陽章

宜陽未得章

宜陽之役楚畔秦章

秦王謂甘茂章

甘茂亡秦且之齊章

甘茂相秦章

甘茂約秦章

涇山之事章

秦宣太后章

秦三 凡十七章

薛公爲魏謂魏冉章

秦客卿造章

魏謂魏冉章

謂魏冉曰和不成章

謂穰侯曰章

謂魏冉曰楚破秦章

五國罷成畢章

范子因王稽章

范雎至章

應侯謂昭王章

秦攻韓圍陘章

應侯曰鄭人章

天下之士章

謂應侯曰君禽馬服章

應侯失韓之汝南章

秦攻邯鄲十七月章

蔡澤見逐章

秦四 凡十章

秦取楚漢中章

薛公入魏而出齊女章

三國攻秦入函谷章

秦昭王謂左右章

元連上為一章

楚魏戰於陘山章

楚使者景鯉在秦章

楚王使景鯉如秦章

秦王欲見頓弱章

頃襄王二十年章

或為六國說秦王章

秦五 凡八章

謂秦王曰臣竊惑章

秦王與中期章

獻則謂公孫消章

樓辭約秦魏章

濮陽人呂不韋章

文信侯欲攻趙章



文信侯出走章

四國爲一章

齊一 凡十七章

楚威王戰勝於徐州章

齊將封田嬰於薛章

靖郭君將城薛章

靖郭君謂齊王章

靖郭君善齊貌辨章

邯鄲之難趙求救章

南梁之難韓氏請章

成侯鄒忌爲齊相章

田忌爲齊將章

田忌亡齊而之楚章

鄒忌事宣王章

鄒忌修八尺章

秦假道韓魏章

楚將伐齊魯親之章

秦伐魏陳軫合三晉章

蘇秦爲趙合從說齊章

張儀爲秦連橫說齊章

齊二凡八章

韓齊爲與國章

張儀事秦惠王章

犀首以梁爲齊戰章

昭陽爲楚伐魏章

秦攻趙趙令樓緩章

權之難齊燕戰章

秦攻趙長平齊楚救章

或謂齊王曰周韓章

齊三凡十一章

楚王死太子在齊章

齊王夫人死章

孟嘗君將入秦章

孟嘗君在薛章

孟嘗君奉夏侯章章

孟嘗君譙坐章

孟嘗君舍人章

孟嘗君有舍人章

孟嘗君出行國章

淳于髡一日章

齊欲伐魏淳于髡謂齊王章

齊四凡十一章

齊人有馮諼章

孟嘗君爲從章

魯仲連謂孟嘗君章

孟嘗君逐於齊章

齊宣王見顏觸章

先生王斗章

齊王使使者問趙章

齊人見田駢章

管燕得罪章

蘇秦自燕之齊章

蘇秦謂齊王曰章

齊五

凡一章

蘇秦說齊閔王章

齊六

凡九章

齊負郭之民章

王孫賈年十五章

燕攻齊取七十餘城章

燕攻齊齊破章

貂勃常惡田單章

田單將攻狄章

濮上之事章

齊王建入朝章

齊以淖君之亂章

楚一

凡二十章

齊楚構難章

五國約秦以伐齊章

荆宣王問羣臣章

昭奚恤與彭城君章

邯鄲之難昭奚恤謂楚章江尹欲惡昭奚恤章

魏氏惡昭奚恤章

江乙惡昭奚恤章

江乙欲惡昭奚恤章

江乙說於安陵君章

江乙爲魏使於楚章

郢人有獄章

城渾出周章

韓公叔有齊魏章

楚杜赫說楚王章

楚王問於范環章

蘇秦爲趙合從說楚章

張儀爲秦破從連橫章

張儀相秦謂昭睢章

威王問於莫敖章

楚二凡九章

魏相翟强死章

齊秦約攻楚章

術視伐楚章

四國伐楚章

楚懷王拘張儀章

楚王將出張子章

秦敗楚漢中章

楚襄王爲太子之時章

女阿謂蘇子章

楚三凡十章

蘇子謂楚王曰章

蘇秦之楚三日乃得見章

楚王逐張儀於魏章

張儀之楚貧章

楚王令昭雎之秦章

張儀逐惠施於魏章

五國伐秦魏欲和章

陳軫告楚之魏章

秦伐宜陽楚王謂陳軫章唐且見春申君章

楚四 凡十三章

或謂楚王曰章

魏王遺楚王美人章

楚王后死未立后章

莊辛謂楚襄王章

齊明說卓滑章

或謂黃齊章

長沙之難章

有獻不死之藥章

客說春申君章

天下合從章

汗明見春申君章

楚考烈王無子章

虞卿謂春申君章

趙一 凡十七章

知伯從韓魏兵章

知伯帥趙韓魏章

張孟談旣固趙宋章

晉畢陽之孫章

魏文侯借道章

秦韓圍梁燕趙救章

腹擊爲室章

蘇秦說李兌章

趙收天下且以伐齊章

齊攻宋奉陽君不欲章

秦王謂公子他章

蘇秦爲趙王使於秦章

甘茂爲秦約魏章

謂皮相國章

或謂皮相國章

趙王封孟嘗君以武城章

謂趙王曰三晉合章

趙二凡七章



蘇秦從燕之趙章

秦攻趙蘇子爲謂秦章

張儀爲秦連橫說趙章

武靈王平晝章

王立周紹爲傅章

趙燕後胡服章

王破原陽章

趙三凡二十三章

趙惠文王三十年章

趙使机郝之秦章

齊破燕趙欲存章

秦攻趙蘭離石祁拔章

富丁欲以趙合章

魏因富丁章

魏使人因平原君章

平原君請馮忌章

平原君謂平陽君章

秦攻趙於長平章

秦攻趙平原君使人章 秦趙戰於長平章

秦圍趙之邯鄲章 說張相國章

鄭同北見趙王章 建信君貴於趙章

衛靈公章 或謂建信君章

苦成常謂建信章 希寫見建信章

魏魴謂建信章 秦攻趙鼓鐸之音章

齊人李伯見孝成王章

趙四 凡十九章

爲齊獻書趙王章 齊欲攻宋秦令起賈章

齊將攻宋而秦楚禁章 五國伐秦無功罷於成臯章

樓緩將使伏事章

虞卿請趙王章

燕封宋人榮蚩章

三國攻秦趙攻中山章

趙使趙莊合從章

翟章從梁來章

馮忌爲廬陵君章

馮忌請見趙王章

客見趙王曰章

秦攻魏取寧邑章

趙使姚賈約韓魏章

魏敗楚於陘山章

秦召春平侯章

趙太后新用事章

秦使王翦章

魏一凡二十七章

知伯索地於魏章

樂羊爲魏將章

西門豹爲鄴令章

文侯與虞人期章

魏文侯與田子方章

魏武侯與諸大夫章

魏公叔痤爲魏將章

魏公叔痤病章

蘇子爲趙合從說魏章

張儀爲秦連橫說魏章

齊魏約而伐楚章

蘇秦拘於魏章

陳軫爲秦使於齊章

張儀惡陳軫於魏章

張儀欲窮陳軫章

張儀走之魏章

張儀欲以魏合於秦韓章  
張子儀以秦相魏章

張儀欲并相秦魏章

魏王將相張儀章

楚許魏六城章

張儀告公仲章

徐州之役犀首謂梁章 秦敗東周與魏戰章

齊王將見燕趙楚章 魏令公孫衍請和於秦章

公孫衍爲魏將章

魏二 凡十七章

犀首田盼欲得齊魏章 犀首見梁君章

蘇代爲田需說章 史舉非犀首章

楚王攻梁南章 魏惠王死章

五國伐秦無功而還章 魏文子田需周宵章

魏王令惠施之楚章 魏惠王起境內眾章

齊魏戰於馬陵章 惠施爲韓魏交章

田需貴於魏王章

秦召魏相信安君章

秦楚攻魏圍皮氏章

龐葱與太子章

梁王魏嬰觴諸侯章

魏三凡十章

秦趙約而伐魏章

芒卯謂秦王章

秦敗魏於華走芒卯章

秦敗魏於華魏王且入朝章

華軍之戰魏不勝章

齊欲伐魏魏使人章

秦將伐魏魏王聞之章

魏將與秦攻韓朱已章

葉陽君約魏魏王將封其子章

秦使趙攻魏魏謂趙王章

魏四 凡二十七章

獻書秦王曰章

八年謂魏王曰章

魏王問張旄章

客謂司馬食其章

魏秦伐楚魏王不欲章

穰侯攻大梁章

白珪謂新城君章

秦攻韓之管章

秦趙構難而戰章

長平之役平都君說章

樓梧約秦魏章

芮宋欲絕秦趙章

爲魏謂楚王曰章

連上爲一

管鼻之令翟强章

成陽君欲以韓魏聽章

秦拔寧邑魏王令人章

秦罷邯鄲攻魏章

魏王欲攻邯鄲章

周肖謂宮他章

周最善齊章

周最入齊秦王怒章

秦魏爲與國齊楚約章

信陵君殺晉鄙章

魏攻管而不下章

魏王與龍陽君章

秦攻魏急或謂魏王章

秦王使人謂安陵君章

韓一 凡二十四章

三晉已破知氏章

成午從趙來章

魏之圍邯鄲章

申子請仕章

蘇秦爲楚合從說韓章

張儀爲秦連橫說韓章

張儀謂齊王曰章

楚昭獻相韓章



秦攻陘韓使人章

五國約而攻秦楚王爲章

鄭彊載八百金章

鄭彊之走張儀章

宜陽之役楊達謂章

秦圍宜陽游騰謂章

公仲以宜陽之故章

秦韓戰於濁澤章

顏率見公仲章

韓公仲見向壽章

或謂公仲曰聽者章

韓公仲相齊楚之交善章

王曰向也子曰章

或謂魏王王倣章

觀鞅謂春申章

公仲數不信於諸侯章

韓二凡二十一章

楚圍雍氏五月章

楚圍雍氏韓令冷向章

公仲爲韓魏易地章

錡宣之敎韓王章

襄陵之役畢長謂章

公叔使馮君於秦章

謂公叔曰公欲得章

謂公叔曰乘舟章

齊令周最使鄭立章

韓公叔與幾瑟爭國鄭彊爲楚章

韓公叔與幾瑟爭國中庶子彊章

齊明謂公叔曰章

公叔將殺幾瑟也章

公叔且殺幾瑟也章

謂新城君曰章

胡衍之出幾瑟章

幾瑟亡之楚章

冷向謂韓咎章

楚令景鯉入韓章

史疾爲韓使楚章

韓傀相韓章

韓三 凡二十四章

或謂韓公仲曰章

或謂公仲曰今有一舉章

韓人攻宋秦王大怒章

或謂韓王曰秦王欲章

謂鄭王曰昭釐侯章

東孟之會章 今連上爲一

韓陽役於三川章

秦大國也章

張丑之合齊楚講章

或謂韓相國曰人之章

公仲使韓珉之秦章

韓相公仲珉使韓侈章

客卿爲韓謂秦王章

舊三章爲一

韓珉相齊章

或謂山陽君曰章

趙魏攻華陽韓謁急章 秦招楚而伐齊章

韓氏逐向晉章 張登謂費繇章

安邑之御史章 魏王爲九里之盟章

建信君輕韓熙章 段產謂新城君章

段干越人謂新城君章

燕一 凡十五章

蘇秦將爲從北說燕章 奉陽君李兌章

權之難燕再戰章 燕文公時章

人有惡蘇秦於燕王章 張儀爲秦破從連橫章

宮他爲燕使魏章 蘇秦死其弟蘇代章

燕王噲既立章

初蘇秦弟厲章

蘇代過魏章

舊三章相連鮑以後二章爲一姚本第三章別提作行恐當日是一章

燕昭王收破燕章

齊伐宋宋急章

蘇代謂燕昭王曰章

燕王謂蘇代曰章

燕二凡十四章

秦召燕王章

蘇代爲奉陽君章

奉陽君告朱謹章

蘇代爲燕說齊章

蘇代自齊使人謂燕章

蘇代自齊獻書於燕章

陳翠合齊燕章

燕昭王且與天下伐齊章

燕饑趙將伐之章

昌國君樂毅章

或獻書燕王章

客謂燕王曰章

趙且伐燕蘇代爲燕章

齊魏爭燕章

燕三凡五章

齊韓魏共攻燕章

張丑爲質於燕章

燕王喜使栗腹章

秦并趙北向迎燕章

燕太子丹質於秦章

宋衛凡十四章

齊攻宋宋使臧子章

公輸般爲楚設機章

犀首伐黃章

梁王伐邯鄲章

謂大尹曰章

宋與楚爲兄弟章

宋康王之時章

智伯欲伐魏章

智伯欲襲衛章

秦攻衛之蒲章

衛使客事魏章

衛嗣君病章

衛嗣君時胥靡章

衛人迎新婦章

中山 凡十章

魏文侯欲殘中山章

犀首立五王章

中山與燕趙爲王章

司馬憙使趙章

司馬憙三相中山章

陰姬與江姬爭爲后章

主父欲伐中山章

中山君饗都士大夫章

樂羊爲魏將攻中山章

昭王旣息民章

總四百八十六章



戰國策補釋卷一

貴陽金正煒仲翬纂

劉向戰國策敘

若鄭之子產晉之叔向齊之晏嬰挾君輔政以並立於中國按廣雅釋詁挾輔也惟挾義從夾而諸子無與夾輔其君者疑當作扶俗書挾作挾與扶相似而誤說文扶佐也一曰相也歌說以相感按說當爲詩左氏襄十六年傳晉侯與諸侯宴於溫使諸大夫舞曰歌詩必類襄二十七年傳請皆賦以卒君貺武亦以觀七子之志昭十六年傳二三君子請皆賦起亦以知鄭志賦卽歌詩也漢紀孝惠

紀詩歌足以感心 力功爭強勝者爲右姚云曾集功作巧按力功當爲力政政誤爲攻攻功古通用因致爲功周書度訓篇力爭則力政力政則無讓大戴禮用兵篇諸侯力政不朝於天子周禮小宰注政字或作政或作正或作征以多言之宜從征漢書五行志天子弱諸侯力政師古曰政亦征也言專以武力相征伐 秦人恐懼不敢闚兵於關中按韓非存韓篇因令象武發東郡之卒闚兵於境上而未名所之秦策芻牧薪采莫敢闚東門高注不敢出於東門闚兵謂出兵也又秦策今反閉關而不敢窺兵於山東者是穰侯爲國謀不忠而大王之計有所失也後漢

書李固傳秦人不敢窺兵於西河文並與此同集韻窺通作闕則此當作關東音近而誤秦策昔者齊南破荆中破宋韓非中作東可爲此證 杖於謀詐之弊終於信篤之誠按終疑當作繆漢書于定國傳注繆違也鮑本作終無亦非下文無道德之教仁義之化以綴天下之心則此句自非無字 爲之謀筴者不得不因勢而爲資據時而爲故按呂覽知度篇非晉國之故高注故法又國語晉語多爲之故以變其志章注謂多作計術以變易其志漢書吳王濞傳使吏効繫訊治以侵辱之爲故師古曰言專以侵辱諸侯爲事業此文以故字句絕諸說並通姚鮑於爲下

注脫字而以故字屬下句非也 雖不可以臨國教化兵革救急之勢也按國教卽邦教向避高帝諱而改也漢書高帝紀注邦之字曰國者臣下所避以相代也周禮地官序官使帥其屬而掌邦教此以臨國教化兵革爲對文鮑本闕國字蓋誤掇也黃丕烈札記以教化斷句遂失其義姚云錢救上有亦字亦當據補文義乃完後漢書崔駰傳范蠡錯執於會稽注執謂謀略也

### 東周

秦興師臨周章周君患之按周自敬王徙都成周卽公羊傳之所謂東周也直至王赧之世始寄食於西周若東西

二周君則居王城與鞏並在河南周雖衰微名爲共主不得夷同列國故國策二周皆非成周之王惟周天子旣託居其上事之涉於成周者亦卽分載二策之中鮑吳爭東西先後以爲尊王誤矣此策言秦興師臨周不云東西則此周君當謂成周之王也夫鼎在郊鄆策不屬之西周者以九鼎爲周之重器非王城周君得而主之故秦求之成周顏率稱爲大王其非兩周之君可知文何爲不曰周王而曰周君儀禮喪服傳君至尊也注天子諸侯及卿大夫有地者皆曰君又禮記昏義疏天子諸侯皆稱君是則稱君者不必能稱王稱王者固亦得稱君惟兩周之稱主君

義乃有別耳此章列之東周以明非九鼎所在之西周非  
卽以周王爲策之東周也 周之君臣內自盡姚云劉曾  
集一作畫錢作盡按作畫是也左氏哀二十六年傳君請  
六子畫杜注畫計策漢書劉澤傳以畫奸澤服虔曰以計  
畫干之 夫存危國美名也得九鼎厚寶也按寶當爲實  
字之譌也文選吳都賦劉注引鄭氏軍所討獲曰實秦策  
司馬錯與張儀章是我一舉而名實兩附頃襄王二十年  
章是王有毀楚之名而無得地之實也名實並舉策文屢  
見又史記魯仲連傳此兩計者顯名厚實也荀悅昌邑王  
論夫行至易以立至難便計也興至福而降至禍厚實也

並爲此文之證 謀之於葉庭之中姚云續後語作章華之庭注云徐廣曰華容有章華亭鮑注卽南陽葉也按葉當作華章華之庭省稱華庭猶楚策之言章臺秦策華陽君趙策作葉陽君史記范雎傳華陽君徐廣曰華一作葉漢書劉向傳亦作葉二形相近易以致誤

秦攻宜陽章景翠以楚之眾臨山而救之按楚兵在山南章鮑注山吳岳屬扶風疑此文卽謂山南之軍而或南字之譌 不如背秦援宜陽按背字義不可通當爲胥字之誤史記趙奢傳胥後命正義胥猶須也管子大匡篇將胥有所定也注胥待六朝人書胥作胥因致誤背援當從吳

說作拔言待秦旣拔宜陽而後進兵也鮑注甚謬吳亦未能訂正

東周與西周戰章爲東周謂韓王曰按周君之秦章謂周最曰高注謂有人謂周最姓名不見也高氏出注於後足證此本章次已淆 西周者故天子之國也多名器重寶按公羊昭二十二年傳王城者何西周也及考王封弟揭於王城其後遂稱西周周自敬王以後皆居成周故謂西周爲天子之故國明非當時之京師也呂覽明理篇有狼入於國高注國都也東周君爲惠公少子班之後其國在鞏未嘗爲天子所都因爲是言鮑氏以周王爲西周固非



以東周君爲在成周亦誤也觀於此文其失自見又左氏莊二十年傳王及鄭伯入於鄆遂入成周取其寶器而還竹書紀年鄭人入王府多取玉是則武王俘商舊玉億有百萬惟故都尙有存者矣

昭獻在陽翟章昭獻在陽翟周君將令相國往相國將不欲按韓策楚王奉幾瑟以車百乘居陽翟令昭獻轉而與之處此策當卽其時吳氏以爲昭獻相韓時事恐非相國猶管韓諸書之稱相室左氏僖二十三年傳吾觀晉公子之從者皆足以相國趙策趙國豪傑之士多在君右而君爲相國者以親蓋以爲執政者之美稱非卽以之名官也

呂覽異寶篇稱宋子罕爲相國無義篇稱樗里子爲相國  
不苟篇稱百里奚爲相國皆追述之辭非當時卽拜此官  
漢書百官公卿表相國丞相皆秦官是先秦雖有是稱名  
官實始於不韋韓非之以相室爲文正以別於秦之新制  
惟漢官儀云相國丞相皆六國時官則以其時嘗有此稱  
因以意爲說耳次將字辭也見文選甘泉賦注引韓詩章  
句又侯鯖錄載蘇東坡云古人以將爲初則此文將不欲  
猶言雅不欲

周最謂呂禮章周最史記作周聚按策文本蓋作取而譌  
也說文取積也徐鍇曰古以聚物之聚爲取殷本紀大取

樂戲于沙邱徐廣曰取一作聚趙策使趙葱及顏取代將  
史作顏聚並可爲證子以齊事秦必無處矣按呂覽愛  
士篇陽城胥渠處高注處猶病也無處謂無患鮑改處爲  
慮義亦相近

周相呂倉章周文君免土工師籍按呂覽諭大篇杜赫說  
周昭文君以安天下高注昭文君周末世分東西之後君  
號也務大篇注則以爲東周之君此策文君蓋昭文之省  
稱士字卽工之誤衍楚策張儀相秦謂昭睢章亦無士字  
當從鮑本省君有閔閔之心謂周文君曰鮑注閔閔亦  
不說也按上君字當爲倉之譌謂呂倉也左氏昭三十二

年傳閔閔焉如農夫之望歲注閔閔憂也倉見國人不說因以爲憂故使人以下文說周文君也鮑注非是春秋記臣弑君者以百數皆大臣見譽者也按公羊莊七年傳注不修春秋謂史記也古者謂史記爲春秋見當作得古書得作尋因誤爲見趙策踰年厯歲未得一城今誤得爲見呂覽首時篇聖人之得時今誤爲見時下文故大臣得譽非國家之美也正作得譽周君遂不免按免當爲問免亦讀文運切與問字同音又因上文免工師籍而譌也不問謂國人不說相倉周君遂亦不求其故也上文稱工師籍爲前相不得更言不免且與大臣得譽非美之文不

合故知爲問之誤

或謂周最章秦以周最之齊疑天下而又知趙之難子齊人戰恐齊韓之合必先合於秦秦齊合則公之國虛矣按子字當從曾本作予予與與通方言十三埤予也注予猶與又一切經音義引三蒼解詁予亦與字此文當以而又知趙之難與齊人戰爲句爲周最謂魏王章秦知趙之難與齊人戰也卽爲此文之證魏策周最入齊章大國欲急兵則趣趙而已亦卽此事鮑氏斷句旣誤釋文自非恐齊韓之合必先合於秦韓疑當作趙秦疑當作齊卽後章所云將恐齊趙之合也此承上文皆就秦爲言公不如救

齊因佐秦而伐韓魏救當爲收字之誤也爲周最謂魏王章王不去周最合與收齊此亦其義秦齊先合故收齊卽可因以佐秦 公東收寶於秦東當爲西字之譌 因以因徐爲之東因徐蓋謂齊也濟東爲徐州因字未詳鮑本作困亦非疑泗之脫爲半字而譌呂覽有始篇泗上爲徐州魯也首時篇齊以東帝困於天下而魯取徐州則泗徐本屬齊 則有合矣有字本當爲肖肖卽趙之缺損劉向敘所云以趙爲肖也合亦全字之譌與下文合誤爲令同戰勝秦且收齊而封之使無多割而聽天下之戰不勝國大傷不得不聽秦封疑當爲勁勁誤爲剏因致誤封猶

三國攻秦章之或爲到或爲利也使無多割者恐益趙也而聽天下聽當作德涉下文聽秦而誤當時之言天下多謂山東諸國如上文所云秦以周最之齊疑天下是也之戰不勝之猶若也韋昭注晉語若之也則之亦可訓爲若亦見王引之經傳釋詞鮑吳注並非 秦盡韓魏之上黨太原西止秦之有已按止當作之篆文相似而誤本在西字之上又誤乙於下遂至義不可通言秦盡韓魏之上黨則趙自太原以西皆將爲秦所有也史記秦紀莊襄王二年使蒙驁攻趙定太原太原卽晉陽詳顧祖禹讀史方輿紀要鮑氏以爲魏地又改正爲土並不足據

石行秦章石行秦謂大梁造姚云劉本作右行楚吳曰一作右右行秦官也按左氏成十八年傳右行辛爲司空注辛將右行因以爲氏則亦不必秦官惟與大梁造並舉似以吳說爲近梁與良同杜預左傳注古字聲同皆相假借此其類也 有周齊秦必輕君君弗如急北兵趨趙以秦魏收周最以爲後行且反齊王之信又禁天下之率齊無秦天下果弗必走按有周齊史作用齊言有見用於齊者則秦必輕君以其無齊重也趨與趣通秦當作秦史記蕭相國世家索隱注奏者趨向之也此策當是辭公在魏時事故以趣趙奏魏說之收周最以爲後行當從史省爲字



後作厚厚又屬之譌也趙世家天下屬行以謀王也燕策  
因犀首屬行以攻趙此亦其義周禮大宰疏盟會立位之  
序次國之士爲後行與此文不合且反齊王之信且爲是  
之誤犀武敗周章行而免且輕秦也且亦當作是策文且  
是二字往往互誤漢書五行志言爽曰反其信韋昭國語  
解反違也果本作某形似而譌某者謀之缺損趙策今之  
諸侯孰謀我韓策韓必謀矣此言爲天下所謀也楚兵在  
山南章周君所以事吾得者器必名曰謀錢劉作某謀之  
爲某猶某之爲謀也史作集亦字之誤 逐周最聽祝弗  
相呂禮者欲深取秦也吳曰深取之深恐因下文衍按深

取策文屢見吳說非也秦策秦之深讐也注深重也或爲探之譌說文探遠取之也易繫辭上傳探頤索隱疏謂闢探求取言闢探秦人之意以取合於義亦通 夫齊合則趙恐伐故急兵以示秦夫字疑是秦之壞文趙欲移禍於齊必將自結於秦此文與魏策大國欲急兵則趣趙而已當屬一時之事示字疑本作市形聲並近而譌也史記項羽紀以市於齊索隱引韋昭云市利於齊也劉氏云市猶要也 秦以趙攻與之齊伐趙其實同理必不處矣鮑注之趣也處猶據也吳正曰注難通處義未詳按秦以趙攻下疑遺齊字國語魯語若從君而走患則不如違君以避

難韋解走之也則之亦可訓爲走趨與走義同齊策猿獼  
猴錯木據水則不若魚鼈注據猶處與此義得轉注不處  
謂變動不居吳正非也 故用祝弗卽天下之理也卽字  
疑當爲郄呂覽任地篇使其民而郄之注郄逆之也禮記  
樂記理之不可易者也注理猶事也俗書郄作却因誤爲  
卽

蘇厲爲周最章君不如令王聽最以地合於魏趙故必怒  
合於齊是君以合齊與強楚吏產子君若欲因最之事則  
合齊者君也割地者最也按此策當爲蘇周在齊時事王  
謂齊王也最自魏復齊其時或有楚疊故說齊王以地合

於魏怒當爲恐字之譌也齊魏合則趙孤故必恐而亟合於齊矣合齊當從一本作全齊不出地而得與國故曰全齊與猶當也秦策以此與天下天下不足兼而有也與此義同吏產子句義不可通吳氏引劉辰翁云吏字當作更平聲於文仍晦疑當作事產於君古書事作吏與吏相似而誤子亦于字之譌于與於同君字當屬上爲句言以全齊當楚事產於蘇子也因最當作困最割地而秦全齊則最之事困矣鮑注並失其義

謂周最曰章三國不敗將與趙宋合於東方以孤秦亦將觀韓魏之於齊也不固則將與宋敗三國則賣趙宋於三

國按與猶以也史記袁盎傳妾主豈可與同坐哉漢書與作以呂覽貴直篇王胡不能與野士乎注與猶用也廣雅釋詁以用也與以音近義同故字得通用左氏僖二十六年傳能左右之曰以公羊桓十四年傳以者何行其意也魏敗楚於陘山章主父結秦連楚宋之交令仇赫相宋故赫能用趙宋二國何不合周最兼相合當爲令之誤

爲周最謂魏王章秦知趙之難與齊戰也將恐齊趙之合也必陰勁之按詩簡兮方將萬舞箋將且也論衡知實篇將且也王不去周最合與收齊而以兵之急則伐齊無因事矣按不猶勿也說詳經傳釋詞謂王當勿任最之去

魏而使主齊魏之事正承上文秦趙爭齊王不可無人而言與謂秦趙鮑氏以爲謂齊則是合齊收齊文不成義矣而讀爲若見周官旅師鄭注之猶是也秦趙皆合於齊若魏惟以兵是急卽伐齊無可因之事言失助也薛公故主公下當有脫字義與後文據故主相反故主謂齊王也而公獨修虛信爲茂行明羣臣據故主不與伐齊者產以忿強秦鮑本無者字按明當爲朋形似而譌也廣雅釋詁朋比也者字當從鮑省產義未詳或當爲座俗書座作座與產相近因以致誤座通作坐趙策今坐而聽秦又云卽坐而地盡矣並與此義同文選張茂先雜詩蘭膏坐自

凝注無故自凝曰坐陸士衡樂府長歌行體澤坐自捐注  
無故自捐曰坐也此文猶云無故取怒於秦又或產字本  
在以字下誤倒於上忿則怨之譌也管子任法篇夫日侵  
而產怨此失君之所慎也產怨猶生怨 天下不能傷齊  
鮑注最之智略足以全齊按上文云不與伐齊不可此不  
當復對魏王薛公爲右齊之言天下不能傷齊者言雖疾  
齊而不能害之秦策穰侯十攻魏而不得傷者非秦弱而  
魏強也與此傷字義同 而有變而讀爲若謂不能傷齊  
或變而合於齊也魏策秦恐王之變也故以垣雍餌王也  
燕策齊秦不合天下無變伐齊之形成矣併與此文同

無變王遂伐之此言伐齊非言伐秦 且臣爲齊奴也如累王之交於天下不可按奴字疑當爲故草書故作奴作奴二形相似因以致誤管子戒篇自妾之身之不爲人持接也注爲猶與也齊策犀首以梁爲齊戰於承匡而不勝言以梁與齊戰也爲與義通古得通用秦策寡人與子故也注故舊也最爲齊王所厚最在魏則天下疑魏陰合於齊故曰累王之交於天下最入齊則王無齊累矣此皆爲最設詞以求入齊也鮑本臣作秦史記留侯世家雍齒與我故集解引漢書音義曰未起時有故怨故字義得兩通又或爲怒字之譌公羊莊四年傳此非怒與注怒遷怒



齊人語也言秦爲齊遷怒則最爲魏累矣鮑氏不辨奴爲字誤強爲之詞吳亦未能訂正

杜赫欲重景翠章鮑注齊策楚策皆有杜赫在齊則威王時於周顯王時也自顯王至是八十年矣疑赫字誤按呂覽論大篇杜赫說周昭文君以安天下高注杜赫周人則赫字固不誤此蓋昭文君時人也 君必施於今之窮士不必且爲大人者故能得欲矣吳越春秋蘆中人豈非窮士乎其時景翠或亡在東周故赫以爲窮士故猶乃也呂覽審己篇臣以王爲已知之矣王故尙未之知耶義與此同

周共太子死章與謂齊王曰章當是一事而傳聞異辭策  
因並存之如秦策張儀又惡陳軫及陳軫去楚之秦二章  
一事而再出也左成司馬翦卽左尙司馬悍耳周本紀文  
與此同末云果立公子咎爲太子矣此策公若欲爲太子  
以下當別爲一章公若卽欲爲太子者之名王類欲令若  
爲之若卽公若自謂也 因令人謂相國御展子廡夫空  
鮑注廡嗇字同小臣也空其名按空當讀苦貢切缺也揚  
子法言酒誥之篇俄空焉此卽其義蓋佚其名族而以空  
字識其闕猶云某也御則舉其氏嗇夫乃舉其名於文不  
類 居中不便於相國按白虎通天子之太子諸侯之世

子皆就於外者尊師重先王之道也

三國隘秦章三國隘秦吳補曰策隘阨字通按三國三晉也見史記周本紀禮記禮器君子以爲隘矣釋文隘本作阨吳說是也 請謂王聽東方之處按謂爲古通史記蕭相國世家上所爲數問君者漢書爲作謂可證荀子議兵篇十里之國則將有百里之聽注聽猶耳目也或曰謂問諜者處當爲虜之誤虜卽墉之省文蓋伺其閒隙之意史作聽東方之變變與虜義正相近 齊重故有周而已取齊是周常不失重國之交也按而字疑當爲更古書更作更而乃更之壞文已與以古通用鄭注禮記檀弓云以與

已字本同取齊當爲取秦史作齊重則固有周聚以收齊  
徐廣曰聚一作最則此策而當作最取當爲收

昭翦與東周惡章爲公畫陰計按畫字疑當爲盡形似而  
譌也國語周語其語盡注盡其心意無所諱也荀子正名  
篇盡盡然注極視盡物之貌 西周必令賊賊公因宣言

東周也以西周之於王也昭翦曰善吾又恐東周之賊已  
而以輕西周惡之於楚鮑本改以西周之於王也作以惡  
之於王也按此策文字淆誤鮑改義亦未安疑善字當在  
昭翦曰之上吾字亦善之譌也西周賊昭翦而可宣言東  
周所爲者以西周之於王也善則不疑其行賊矣善字正

與上文與東周惡相應善字既淆次於下後人因疑次善字爲複誤而改爲吾本義遂湮輕當從王氏雜志作誣此二句蓋昭翦計度之辭於文不應有吾字

嚴氏爲賊章小國不足亦以容賊鮑注衍亦字吳補曰亦疑在不字上一本無按燕策直患國弊力不足矣與此不足義同亦當爲元二形相似而誤元卽古文其字墨子公孟篇元多誤亦可爲此證經傳釋詞其猶寧也亦與豈通又按聶政之刺韓傀策固云獨行仗劍入韓東孟之會章乃有陽堅之名此云韓使人讓周周君患之似不獨留賊之嫌者據韓非說林上篇嚴遂不善周君患之馮沮曰嚴

遂相而韓傀貴於君不如行賊於韓傀則君必以爲嚴氏也是陽堅實周所遣聶政旣殺韓之君相堅之蹤跡亦爲韓人所覺但不悉馮沮之謀猶以爲聶之黨徒耳蓋適如沮所算也

### 西周

薛公以齊章取宛葉以北以强韓魏鮑本作爲强韓魏注爲猶代按爲猶以也禮記郊特牲帝牛不吉以爲稷牛疏爲猶用也漢書賈捐之傳皆可且無以爲注爲猶用也爲字蓋與以之訓用義同爲强韓魏亦卽以强韓魏 陰合於秦鮑本於作爲按於爲古通用東周策夫秦之爲無道

也秦策楚亦何以軫爲忠乎鮑本爲並作於漢書韋玄成傳成以爲禮不得師古曰於禮不合也又云列爲三公宋祁曰爲疑作於則由不明二文之互通也 欲王令楚割東國以與齊也按左氏昭十四年傳故屈罷簡東國之兵於召陵注兵在國都之東者此文東國卽楚策所云東地君令敝邑以此忠秦鮑本作惠秦與史記同按忠當爲惠之譌古德字也由惠誤惠復誤爲忠

秦令樗里疾章周君迎之以卒甚敬按敬當讀爲敝詩常武旣敬旣戒箋敬之言敝也周禮夏官序官注引作旣敝旣戒管子立政篇修火憲敬山澤亦以敬爲敝

雍氏之役章楚王始不信昭應之計矣始當爲殆二形相似而譌也荀子彊國篇雖爲之築明堂於塞外而朝諸侯殆可矣注殆庶幾也 吾無徵甲與粟於周亦已多矣按禮記三年間無易之道也疏無不也文選東京賦宜無嫌於往初薛注無猶不也策文無不通用

蘇厲謂周君章是攻用兵高注攻巧玄也鮑注攻功字言善巧也吳正曰攻工字通借按爾雅釋詁攻善也與高注義合攻字自訓巧善不必爲功工通借 有一人過曰善射可教射也矣養由基曰人皆善子乃曰可教射姚云劉錢皆下有曰字按善射二字涉上文而衍皆卽比曰二字



誤併爲一也策文皆比通用如比是也之類徐鍇曰比皆也 百發百中而不已善息姚云錢劉已作以鮑本亦作以按已猶以也禮記檀弓注以與已字本同 弓撥矢鉤鮑本鉤作拘按荀子正論篇羿蠡門者天下之善射者也不能以撥弓曲矢中注撥弓不正之弓說文鉤曲也後漢書鄧訓傳注孫卿子曰拘木必待隱括蒸揉然後直也拘音鉤謂曲者也

楚兵在山南章吾得將爲楚王屬怒於周高注吾當爲五楚五將者也鮑本改吾爲伍吳曰吾字譌當作伍按竹書紀年楚吾得帥師及秦伐鄭則作吾固不誤 不如令太

子將軍正迎吾得於境而君自郊迎高注使太子與軍正於境迎吾得也鮑注軍正猶卒正軍之率也按列子說符篇楚王悅之以爲軍正亦見史記司馬穰苴傳是當時固有此官名惟太子將軍正辭義未完疑正字當訓爲直爾雅釋泉正出直出也漢書匈奴傳上直欲從單于求之注直猶正爾又或正爲出字之譌高注亦誤言太子將軍出迎於境上也武后所製正字作𠂔與出相似因誤爲正周君所以事吾得者器必名曰謀姚云一無必字錢劉謀作某按此爲周君謀間吾得於楚本無其器故設言某無必字及作某者不誤儀禮士冠禮某有子某注古文某爲

謀則謀卽某也鮑氏以下文楚字連謀爲句於文不合且名器曰謀楚亦遠於事情

楚請道於二周章楚請道於二周之間以臨韓魏高注臨猶伐也按詩皇矣疏臨者在上臨下之名論語爲政篇皇疏臨謂以高視下也薛公以齊章君臨函谷而無攻韓魏易地章韓兼兩上黨以臨趙卽趙羊腸以上危張儀事秦惠王章是王內自罷而伐與國廣鄰敵以自臨而信儀於秦王也臨之義猶厭案也高注未安 除道屬之於河左氏莊四年傳除道梁嗟營軍臨隨注更開直道漢書高帝紀築甬道屬河師古曰屬聯也

司寇布章越人請買之千金折而不賣按漢書食貨志用其本賈取之母令折錢此言千金猶未盡其本賈故曰折也或爲斲之省文廣雅釋器斲刀削也刀劍古通稱蓋謂匣而藏之不輕視人也又或爲斥字之譌廣雅釋詁斥推也漢書曹參傳輒斥去之師古曰斥卻也言越人雖買以千金仍推卻不賣以其非能知劍也 必無獨知無猶不也必不獨知謂終有知者此喻周君欲使最爲太子以爲人當知之然如千金不得買劍或將意其不賣則君之告齊猶函冶氏之謝越人也所謂必無獨知者終亦不可得矣高注必無以語人獨知其利鮑氏亦本其說吳正曰言

凡有售必使眾知其良不可獨知也義並未安 臣恐齊王之爲君實立果而讓之於最以嫁之齊也按此言齊王將疑周君之立太子意別有屬而謂最自不肯以賣齊也爲與謂通宋策宋所謂無雉兔鮒魚者也墨子公輸篇謂作爲周書官人篇此之謂考志也大戴禮文王官人篇謂作爲並與此同果疑本作某公羊宣六年傳於是使勇士某者往殺之注某者本有姓氏記傳者失之廣雅釋詁某名也此則不知其人而設爲之詞齊策羣臣之可用者某漢書楚元王交傳某非敢忘封之也并以某字代名此亦其例

秦召周君章王何不出於河南周君聞之將以爲辭於秦而不往鮑本出下有兵字按出當爲田字之譌也周禮甸祝掌四時之田注田者習兵之禮公羊桓四年傳注田者蒐狩之總名也魏王田於河南疑於闕周故周得以備魏爲辭於秦若出兵周境非復爲周謝秦策矣史記信陵君傳公子與魏王博而北境傳舉烽言趙寇至且入界魏王釋博欲召大臣謀之公子止王曰趙王田獵耳非爲寇也已而果然是亦疑田爲兵之證河南言河之南中牟陽武酸棗卷皆魏分地非謂洛陽郊廓也田誤爲出後人因補兵字史記亦沿策文之誤將字疑本作得形似而譌也

犀武敗於伊闕章周君謀主也高注周天子也故曰謀主按左氏昭九年傳我在伯父猶衣服之有冠冕木水之有本原民人之有謀主也注民人謀主宗族之師長吳正非也而設以國爲王扞秦按齊策今先生設爲不宦注設者虛假之辭又漢書趙充國傳數使使尉黎危須諸國設以子女貂裘欲沮解之注設謂開許之也言周雖不能爲王扞秦猶得藉口居爲隱蔽用以德魏王無以報之則有辭事秦矣周君形不利事秦而好小利黃氏札記云上小字因下文而衍讀以秦字句絕其說視鮑爲長鮑本形不下有好字注云國小多憂其勢宜不得游觀有秦助

則無國患乃得游觀疑鮑所見本秦或爲秦泰安也故云  
無患 是上黨每患而贏四十金每益母字之譌毋與無  
通鮑本正作無

韓魏易地章故易成之曰楚趙皆輕楚王恐因趙以止易  
也鮑本曰作日按唐人作書曰日無別姚本當由其時傳  
寫之譌又儀禮士喪禮占曰某日從注古文曰爲日國語  
周語視遠日絕其義漢書日作曰亦此類也韓策趙聞之  
起兵臨羊腸楚聞之發兵臨方城而易必敗矣正謂此事  
鮑本因趙下有兵字此或誤脫因趙猶云連趙周書作雒  
篇北因於邾山注因連接也



秦欲攻周章攻周實不足以利國而聲畏天下按呂覽過理篇臣聞其聲注聲名也史記太史公自序其實中其聲者謂之端索隱云聲者名也策文每以名實對舉此特變文爲聲義猶名也史記趙世家其於義也聲善而實惡趙策聲德於與國而實伐空韓並以聲與實相對爲文鮑注不誤而義則未盡

宮他謂周君章鄭恃魏而輕韓魏攻蔡而鄭亡鮑本蔡作秦按蔡當爲楚古文蔡作𦵏上體與楚相似又涉下文陳蔡亡於楚而譌也韓非飾邪篇鄭恃魏而不聽韓魏攻荆而韓滅鄭魏策鄭恃魏以輕韓伐榆闕而韓氏亡鄭並可

爲證惟哀侯滅鄭蔡已先併於楚則言攻蔡猶攻楚也作秦無據或本爲荆音近而誤此皆恃援國而輕近敵也按援上無遠字於義不完疑本作恃遠援與輕近敵爲對文秦策楚國援也鄰國敵也亦以援與敵對援卽援國也謂齊王曰章王何不以地齎周最按周禮掌皮歲終則會其財齎注齎所給予人以物曰齎鄭司農云齎或爲資又外府注鄭司農云今禮家定齎作資意謂資齎同耳其字以齊次爲聲從貝變易古今亦多或

三國攻秦反章楚宋不利秦之德三國也彼且攻王之聚以利秦按德字鮑本作聽是也史記劉賈傳入楚地燒其

積聚以破其業無以給項王軍食此文攻王之聚亦卽其義故云以勁秦也聚又或爲敝字之譌敝誤爲取因誤作聚謂三國將擊其歸師猶趙策所云過章子之路是以魏軍設舍速東 令軍設舍速東按左氏僖十五年傳晉大夫反首拔舍從之注拔草舍止此文設疑拔字之譌襄二十八年傳今子草舍無乃不可乎拔舍猶草舍也韓非十過篇衛靈公將之晉至濮水之上稅車而放馬設舍以宿與此不合

犀武敗章主君之臣又秦重而欲相者鮑注秦之所重欲得相周按國語晉語三世仕家君之再世以下主之故兩

周三晉多稱主君又與有通易繫辭上又以尙賢也釋文鄭本又作有秦策臣又知其思與不思鮑注注家說有爲又則又亦有也 交善於秦且公之成事也鮑本且作是改成事爲事成吳補曰恐當作事成按此且字與上文且輕秦也並當從鮑本作是成事猶言成功燕策其於成事而已與此義同鮑改及吳補並誤

秦一

衛鞅亡魏入秦章衛鞅亡魏入秦孝公以爲相封之於商號曰商君高注衛鞅魏公子叔痤之子也按痤爲魏之公族鞅則衛之庶孫史記商君傳彼王不能用君之言任臣

又安能用君之言殺臣乎通鑑作用子之言其辭若此非  
痤之子明矣或謂高氏以公叔亦稱公孫痤因誤爲衛人  
顧高注呂覽知分篇云公孫氏齊羣公子之子故曰公孫  
氏且此注亦不以公孫爲衛之國姓也其說不知何據故  
鮑氏不取而從史索隱商君傳注於商二縣名在弘農正  
義曰於商在鄧州內鄉縣東七里古於邑也商洛縣在商  
州東八十九里本商邑周之商國通鑑秦封衛鞅商於十  
五邑注引裴駟曰商於之地在今順陽郡南鄉丹水二縣  
有商城在於中故謂之商於鮑注未晰 商君歸還惠王  
車裂之而秦人不憐按呂覽無義篇注引戰國策曰鞅欲

歸魏秦人曰商君之法急不得出也惠王得而車裂之今策無此文而見於注疑注文商君懼誅二十三字本在策文惠王句上商君歸還四字又當在注中怨而不納下也蘇秦始將連橫章大王之國按秦至惠文後元始僭王號史記張儀傳儀相秦四歲立惠王爲王正義引表云惠王之十三年周顯王之三十四年也蘇子游秦距誅商君未久不應卽稱大王當是追錄之文漢書樊噲傳暴師霸上以待大王師古曰時項羽未爲王此言大王史追書耳與此正同他策亦多類此車騎之用按國語鄭語時至而求用韋注用備也古者使車轂擊馳言語相結天下爲

一按漢書匈奴傳辯者轂擊於外注言使車交馳其轂相擊也此衍馳字擊與結一爲韻 上下相愁民無所聊按漢書揚雄傳名曰畔牢愁鄭音愁爲曹說文禾部秋字從禾爰省聲火部爰讀若焦愁字從秋故古音士交反與聊爲韻漢書廣川惠王傳爲作歌曰愁莫愁居無聊讀音亦與此同 辯言偉服戰攻不息按偉與瑋通王逸天問章句序琦瑋譎詭瑋固與詭義同史記劉賈傳豈不偉哉漢書荆燕吳傳作豈不危哉危卽詭之省也偉服猶詭服爾雅釋詁服事也管子任法篇無偉服無奇行韓非說疑篇有務奉下直曲怪言偉服瑰稱以眩民耳目者並與同義

羸滕履蹻負書擔橐鮑本羸作羸吳曰作羸是羸與縲  
累字通用按作羸者當是韓非外儲說下篇羸勝而履蹻  
羸勝卽羸滕淮南修務篇於是乃羸糧跣足注羸裏也莊  
子胠篋篇羸糧而趨之釋文羸裏也左氏桓二年傳注若  
今行滕者疏滕訓緘也然則行而緘足故名行滕釋滕爲  
囊卽與擔橐文複吳氏引詩注以滕爲邪幅足正鮑注之  
誤惟以作羸爲是似不若羸之義長 狀有歸色高注歸  
當爲愧愧慙也音相近故作歸耳按禮記緇衣私惠不歸  
德鄭注歸或爲懷文選上林賦悠遠長懷郭注懷亦歸變  
文耳此策歸當爲懷而讀如壞左氏襄十四年傳王室之



不壞釋文服本壞作懷墨子迎敵祠篇予必懷亡爾社稷  
是懷與壞古蓋通用詩小弁譬彼壞木傳壞亦作痍傷病  
也此云懷色卽承上文枯槁犁黑而言呂覽察微篇因歸  
邱氏之宮而益其宅俞樾諸子平議云歸當讀如壞可爲  
此文之證於是乃摩燕烏集闕見說趙王於華屋之下  
按廣雅釋詁摩順也義與循近言自周之趙循燕烏集闕  
而行也漢書鄒陽傳周用烏集而王或卽闕名所取義華  
屋猶王屋史記周本紀至于王屋集解引馬融曰王屋王  
所居屋平原君傳文不能取勝則歃血於華屋之下滑稽  
傳楚莊王之時有所愛馬衣以文繡置之華屋之下是諸

侯皆有華屋如其有路寢也舊注並非 伏軾搏銜按漢

書王吉傳馮軾搏銜臣瓚曰搏促也師古曰搏挫也 貧

窮則父母不予富貴則親戚畏懼人生世上勢位富厚蓋

可忽乎哉按史記舜本紀二女不敢以貴驕事舜親戚正

義云親戚謂父瞽叟後母弟象妹戢手等也又韓詩外傳

曾子親戚旣沒欲孝無從漢書何武王嘉師丹傳贊董賢

之愛疑於親戚親戚猶親屬秦謂其父母妻嫂也蓋當讀

爲盍禮記檀弓子蓋言子之志於公平注蓋皆當讀爲盍

韓策然則蓋觀公仲之攻也蓋一作盍廣雅釋詁盍何也

秦惠王謂寒泉子章諸侯之不可一猶連雞之不能俱止

於棲之明矣鮑本作亦明矣按楚策寡人之獨何爲不好  
色也魏策且君之嘗割晉國取地也何必以兵哉之字皆  
當爲亦草書亦作𠂇與之字形相似易以致誤段玉裁說  
文解字注云六朝人以草寫書迨草變眞往往譌誤此卽  
其類也

冷向謂秦王章燕趙惡齊秦之合必割地以交於王矣交  
當爲效劉向所謂本字多誤脫爲半字也 且以恐齊而  
重王恐字疑本爲恣言將使天下疾齊之恣而交走秦也  
又秦刻石文恣作資是恣資字得通假爲用資齊猶齊策  
之言藉力於魏也史記春申君傳今王資之與攻楚義與

此同

張儀說秦王章臣聞天下陰燕陽魏連荆固齊收餘韓成  
從將西南以與秦爲難按策文常以天下目山東諸國如  
秦以周最之齊疑天下之類此文所云天下則專言趙或  
以其爲中央之國也陰燕陽魏皆就趙言高注陰小陽大  
恐非本義韓非初見秦篇文與此同注云燕北故曰陰魏  
南故曰陽又韓上無餘字秦下有強字西南作西面皆當  
據以訂正 悉其士民張軍數千百萬白刃在前斧質在  
後而皆去走不能死罪其百姓不能死也其上不能殺也  
鮑本罪作非無其上不能殺也六字數千百萬韓非作數

十百萬而皆去走以下作而卻走不能死也非其士民不能死也上不能故也按去當從韓非作卻罪亦當作非殺當作教字之譌也殺字或書作敎與教相似而誤韓作故亦非論語以不教民戰是謂棄之與此文義略同管子七法篇是故張軍而不能戰左氏桓六年傳我張吾三軍注張自侈大也曾作張軍聲無取是知秦戰未嘗不勝攻未嘗不取所當未嘗不破也知當作故韓非正作故昔者齊南破荆中破宋西服秦北破燕中使韓魏之君按中破宋當從韓非作東破宋與下文五戰相應齊無東自儀言之宋與齊並爲東也使當爲役後章齊弱則必爲王役

矣史記司馬相如傳今奉幣役至南夷漢書作使二形相近易以致誤 足以爲限高注限難也王念孫雜志云限本作阻今作限者後人據韓子改之按說文限阻也漢書韓安國傳唯梁最親爲限難限與阻義同不必據文選注改 長城鉅坊姚云錢劉坊作防按燕策作鉅防廣韻防坊同水經濟水注平陰城南有長城東至海西至濟河道所由名防門去平陰三里齊侯塹防門卽此也 大破荆襲郢取洞庭五都江南按都當爲渚字之譌也蘇秦傳集解引策文作五渚又燕策四日而至五渚並可據以訂正吳氏謂當從韓非作五湖亦非 此固已無伯王之道一

矣吳曰韓無作失按有無之無古與亡失之亡同文此策本作亡伯王之道故亦作失亡字傳寫爲無遂失本義

舉魏則荆趙之志絕荆趙之志絕則趙危趙危而荆孤按志當爲地音近而譌也韓作意亦誤魏策魏不北則從道絕與此義同 是故兵終身暴靈於外士民潞病於內韓非作暴露鮑本亦作露按作露者是也國語魯語使君盛怒以暴露於敝邑之野漢書蕭何傳今王暴衣露蓋燕策爲將軍久暴露於外文義並同暴露潞病皆以駢字爲對文如以露潞同字爲文病則靈雨旣零亦有疑義矣黃氏以靈爲零之假借暴謂日靈謂雨其說紆曲無據仍當從

韓作露於文爲安又按終身二字疑本在兵字之上誤淆於下謂終穰侯之身也兵下亦有脫字當與下句相對爲文 大王以詐破之拔武安按趙括未嘗封於武安高注恐有譌誤據史記秦聞趙用括乃陰起武安君爲將此文拔武安三字疑本在大王下誤淆於後耳又秦本紀武安君歸王齕將伐趙武安皮牢拔之在破趙長平之次年或卽此文所指也 完河間韓作筦樂記鄭注筦猶包也 不用一領甲不苦一民皆秦之有也按此文本作不頓一甲與次句爲對文用卽甲之誤衍領爲頓之譌又與一字倒置遂至句法參差左氏襄四年傳甲兵不頓注頓壞也



漢書嚴助傳不勞一卒不頓一戟文與此正同 代上黨  
不戰而已爲秦矣東陽河外不戰而已反爲齊矣中呼池  
以北不戰而已爲燕矣按代上黨句曾於而已下有反字  
是也爲燕上亦當有反字而脫耳秦當爲趙後人不達反  
爲之義而改也反與叛通爲猶於也國語晉語稱爲前世  
韋注言見稱譽於前世左氏襄三十一年傳其爲美錦不  
亦多乎杜注多於美錦西周策君不如令敝邑陰合於秦  
鮑本作陰合爲秦東周策夫秦之爲無道也鮑本作夫秦  
之於無道也皆於爲通用之證此言不待戰而皆反其國  
以應秦卽上文所云皆秦之有下文所云東弱齊燕也又

呂覽觀表篇西河之爲秦也不久矣注言西河叛魏入於秦也趙爲秦殘破則東北邊地亦將折入燕齊於義亦通中呼池韓非作中山呼沱此蓋誤脫禮記禮器晉人將有事於河必先有事於惡池注惡當爲呼聲之誤也呼池漚夷并州川釋文惡依注音呼又音虐好故反池大阿反決白馬之口以流魏氏高注流灌也韓作沃說文沃灌也釋名釋水縣出曰沃泉水從上下有所灌沃也古書流作汙與沃形近疑文注本並作沃與韓同一舉而三晉亡從者敗大王拱手以須天下徧隨而伏韓作編隨而服鮑本亦作編按漢書路溫舒傳編用寫書師古曰編聯次之

易艮不拯其隨注隨謂趾也儀禮鄉射禮注始前足至東頭爲距後足來合而南面爲隨編隨猶云接踵也編徧形近而誤伏服義同 以大王之明秦兵之強伯王之業地尊不可得乃取欺於亡國按地當從劉作也尊當從韓作曾形聲之誤也乃與曾義複或爲反之壞文 乃復悉卒乃攻邯鄲不能拔也棄甲兵怒戰慄而卻鮑本乃攻作以攻按篆文以作巳乃作𠂔二形相似因誤爲乃棄甲兵怒韓作棄甲兵弩怒作弩是也兵則折字之譌耳篆文折作𠂔兵作𠂔出𠂔義雖殊而文相類移左於下折遂譌誤爲兵矣 軍乃引退并於李下大王又并軍而致與戰乃當

作以以與已通周禮環人掌致師注致師者致其必戰之  
志言軍已引退又并力而挑戰也 襄主錯龜數策占兆  
以視利害鮑注錯措同置也按鮑說非也錯當爲鑿聲之  
誤耳韓非飾邪篇鑿龜數策占曰大吉文與此同周禮太  
卜司農注作龜謂鑿龜令可爇也疏鑿卽灼也初見秦篇  
作鑽與鑿義同晉出公名鑿見史記索隱六國表作錯可  
爲此證 言所以舉破天下之從按舉上當有一字而誤  
脫下云一舉而天下之從不破正與此句相應姚云一本  
無舉字亦非 大王斬臣以徇於國以主爲謀不忠者姚  
云曾恐當作主謀鮑本作以主不忠於國者鮑注主言以

爲首惡按文選任彥昇奏彈曹景宗文景宗卽主李注主  
謂爲主首也鮑注義與之同惟云以主首爲謀不忠者亦  
爲不詞主之爲義益當如正呂覽自知篇湯有司過之士  
注司主也主正也正其過闕也又禮記曲禮疏主猶坐也  
一切經音義二引蒼頡坐臯也

張儀欲假秦兵章子不予之魏不反秦兵張子不反秦按  
不予之不疑卽之譌卽其之古文鮑本作不如予之張  
子不反秦據高注不字下當有敢字今誤淆次於後文  
張子得志於魏不敢反於秦矣據高注此無敢字 張子  
不去秦張子必高子高注高貴也鮑注去猶捨也儀雖爲

魏猶有得秦之心高貴重也高之者欲茂以秦資之吳正  
曰劉辰翁云不去秦萬一不行救魏也亦必高茂之誼高  
茂之忠按廣雅釋詁高上也趙策趙從親以合於秦必爲  
王高矣注言趙居齊上漢書五行志妻以貴高夫高夫猶  
乘夫此言不以事去張子而使之在秦則必高出於茂之  
上也秦惠王死章言甘茂爲張儀之讐故左成所爲茂策  
者皆欲使儀不復反秦鮑劉說並失其義

司馬錯與張儀章塞轅轅緱氏之口當屯留之道按左氏  
襄二十一年傳使候出諸轅轅注轅轅關在緱氏縣東南  
此文緱氏二字疑本旁注誤併入文漢書京房傳毋使臣

塞涌水之異注塞亦當也則當之義亦猶塞 魏絕南陽  
高注魏與南陽絕也鮑注秦使之絕按呂覽知接篇又絕  
諸侯之地以襲國注絕過也史記李將軍傳南絕幕正義  
絕度也文選西京賦橫西洫而絕金墉薛注絕度也秦召  
周君章秦召周君將以使攻魏之南陽韓魏易地章且魏  
有南陽鄭地三川而包二周南陽時屬魏而與周韓地接  
故欲以魏兵度南陽而臨周韓也 誅周主之罪侵楚魏  
之地按呂覽報更篇張儀所得於天下者無若昭文君周  
千乘也重過萬乘也令秦惠王師之又甘茂說秦武王云  
臣聞張儀西并巴蜀之地天下不以多張儀而賢先王並

與此策不合但可各從本文侵楚魏之地與上文親魏善  
楚相反必有譌誤疑侵當作俠俠與挾通地當爲從六書  
通地一作埏與從相似因致誤地挾楚魏以臨周故周自  
知不救或侵爲復字之譌復其侵地以市德於楚魏而并  
力於周韓也新序善謀篇誤與此同 取其地足以廣國  
也得其財足以富民繕兵不傷眾而彼已服矣史記張儀  
傳無也字繕兵斷屬下句正義云繕音膳同饌具食也按  
周禮夏官序官繕人注繕之言勁也禮記曲禮急繕其怒  
注繕讀曰勁勁兵猶云張軍 蜀主更號爲侯而使陳莊  
相蜀按華陽國志周赧王元年秦惠王封子通國爲蜀侯



以陳壯爲相置巴郡此言更號者蜀之開明氏久稱王自是而滅更爲侯國而猶乃也莊壯字古通用禮記檀弓柳莊古今人表作柳壯正與此同

張儀欲以漢中章請秦王曰吳曰請當是謂字按爾雅釋詁請告也說文請謁也漢書王溫舒傳舞文巧請下戶之猾以動大豪注請謂奏請此文作請自通不必爲謂之誤地大者固多憂乎固猶乃也說詳經傳釋詞高訓爲必於義未安又固與顧通呂覽審分篇注顧反也天下有變王割漢中以爲和楚按爲和二字或誤乙也爲猶於也鮑本作王割漢中以楚和廣雅釋詁以與也儀禮大射儀

以耦左還注以猶與也於義各通 卽天下有變王何以市楚也漢書西南夷傳卽以爲不毛之地注卽猶若也

楚攻魏張儀謂秦王章魏戰勝復聽於秦姚云錢劉作魏戰勝德於秦按作德者是勝下疑脫罷字言魏戰勝而罷恐秦乘其敝又德秦爲之勁則必入地於秦也下文犀首戰勝威王魏兵罷敝恐畏秦果獻西河之外正與儀言相應若無罷字則不得言復禮記少儀師役曰罷注罷之言罷勞也軍雖戰勝不無傷亡故可逆知其罷也 王用儀言取皮氏卒萬人車百乘以與魏犀首戰勝威王高注皮氏魏邑按竹書紀年顯王三十九年卽魏惠成王後六年

書秦取我汾陰皮氏而史記六國年表於顯王四十年系  
魏敗楚於陘山林春溥戰國紀年編此策於敗楚陘山之  
後是皮氏時已入秦矣且以魏邑卒乘助魏亦事理之所  
無高注疏失莫此爲甚又魏取陘山史稱其伐喪事在楚  
威王死之次年此云威王疑有譌誤或楚人未告新君嗣  
立因舉故君之諡歟

田莘之爲陳軫章周書有言美女破舌按盧文弨校周書  
云今戰國秦策引此破舌作破少唯高誘所注本與此同  
今本無作少者不知盧氏所據何本蓋以少老相對爲文  
也王念孫周書雜志云破舌義不可通舌當爲后段玉裁

說文注亦云破舌爲破后之譌漢書人表后庸國語作舌庸可爲此證老字古讀如柳擊鼓雞鳴諸詩並與手酒爲韻此文作后正與破老句叶尙書畢命惟周公克慎厥始惟君陳克和厥中惟公克成厥終三后協心同底於道是后亦重臣之稱與老爲國老義同故荀息徵引是言以謀去僑奇也 今秦自以爲王能害王者之國者楚也按王爲王霸之王西周策則秦孤而不王矣秦王欲見頓弱章橫成則秦帝從成則楚王此卽其義王者卽孟子所謂五百年必有王者興是也高注惠王始僭尊號故曰自以爲王鮑氏謂時亦未王謂其欲之並失本義能當讀爲而能

而古通用說詳經傳釋詞趙策厚任蒯以事能重責之未  
期年而蒯亡走矣能亦猶而也韓非六反篇害者利之反  
也惟楚不利有王者卽韓策大國惡有天子之意史記屈  
原傳上官大夫與之同列爭寵而心害其能賈誼傳絳灌  
東陽侯馮敬之屬盡害之害之義並與忌同 楚智橫君  
之善用兵鮑本智作知按智知通用不煩改易墨子耕柱  
篇豈能智數百歲之後哉又曰未可智也皆以智爲知高  
注橫門君秦將此文脫門字當據注補尉繚子分塞令篇  
吏屬無節士無伍者橫門誅之橫門君蓋因官以爲號如  
公孫衍之稱犀首也

張儀又惡陳軫章非獨儀知之也行道之人皆知之曰孝已愛其親天下欲以爲子按書大誥曰有大艱於西土傳曰語更端也又詩角弓見睨曰消疏曰者人言之辭策文此例甚多 吾不忠於君楚亦何以軫爲忠乎小爾雅廣詁以用也爲忠之忠當作惠因上文不忠於君而誤惠乃唐武后所造臣字也管子七臣七主篇愚臣讒賊今本作愚忠誤與此同 乃必之也鮑本作乃止之按漢書韓信傳且漢王不可必注必謂必信之作必於文自通惟作止義明又必與畢古通用爾雅釋天濁謂之畢李注畢止也周官隸僕掌蹕宮中之事鄭眾注蹕謂止行者說文釋止

也廣雅釋詁趕止也從畢之字多有止義此文疑卽畢之借字

陳軫去楚之秦章卽復之楚願王殺之卽猶若也 臣出必故之楚以順王與儀之策而明臣之楚與不也按楚與當爲與楚而誤倒也與猶爲也說詳釋詞呂覽審爲篇則不知所爲矣注爲謂相爲之爲韓非外儲說陽胡潘其於王甚重而不爲薛公此卽其義軫以秦之國情輸楚是爲楚也後文楚與二字亦當乙正鮑吳注並非 長者詈汝少者和汝按後漢書徐登傳又嘗臨水求度船人不和之注和猶許也正與上文少者許之下文欲其許我也相應

鮑注和猶應也應與許義亦相近後漢馮衍傳引作少者  
報之 臣不忠於王楚何以軫爲按左氏成二年傳是棄  
君於惡也何臣之爲杜注若言何用爲臣此文與左同而  
義與杜異以卽用也爲是助語見禮記曾子問孔疏一本  
爲下有忠字亦臣字之譌與上章同言楚亦何用不忠者  
爲之臣也

元和陸俊業季因校

戰國策補釋卷一終